

REGIONAL NEWS BULLETIN

HEADLINES (EVENING)

1. Governor Dr. Hari Babu Kambhampati an Mizorama kutthemthiamte PM Vishwakarma hmanga an hlawhtlin theihna tur chuan bank te nena thawhho that a pawimawh a ti.
2. Chief Minister Pu Lalduhoma'n Mizorama Myanmar, Manipur leh Bangladesh atanga raltlan awm te chu theihtawpa chhawmdawl mek an ni a, an tanpuina chuan politics lama inpumkhatna thui takin a hril a ni a ti.
3. Union Home Minister Amit Shah chuan vawiin khan All India Conference of Directors General and Inspector General of Police, Bhubaneswar-ah a hawng.
4. University Grant Commission chuan Under Graduate zir laite tan degree course zir chhung pawhtawi emaw pawhsei theih dan tur a siam sak thuai dawn.

<><><>

GOVERNOR

Governor Dr. Hari Babu Kambhampati chuan Mizorama kutthemthiamte PM Vishwakarma hmanga an hlawhtlin theihna tur chuan bank te nena thawhho that a pawimawh a ti.

Wawiina Aizawl Sipai Lammuala PM Vishwakarma Exhibition cum Trade Fair a tlawhnaah Larsap chuan Akashvani corr zawhna chhangin he thu hi a sawi a. Larsap chuan PM Vishwakarma scheme chu mi themthiamte te puihna tur a ni a ti a. A then chu thlah tute atanga kutthemthiamna inthlahchhawng an nih thu leh heng mi, an thilsiam zau taka zuarchhuak duh, mahni kea ding duhte puihna tur a ni a ti a. PM Vishwakarma hnuaiah hian kutthemthiamte chu skill training te pein sum lamah pawh puih an ni dawn a ni a ti a. Hetiang mite puih theih dan tur te inhrilhhriatna pawimawh tak ni turin exhibition pawh huaihawt a nih thu sawiin hemi hmang hian mipuiin engtin nge puihna an dawn theih bakah, eng kutthemthiamna nge neih tul tih te an hre thei dawn a ni a ti.

Larsap chuan inphochhuak te a kawmkuala an harsatna lian bera an sawi chu a hralhchhuahna tur, marketing bakah bul tanna tur sum a ni a ti a. Bank lamin an mamawh an phuhru taw lo tih an lo hrilh thu a sawi ni. Larsap chuan bank ten PM Vishwakarma kaltlang emaw, PM Vishwakarma hnuaia pek theih a nih loh chuan MUDRA scheme atang pawhin cheng nuai 10 thlenga tanpui theih an ni a ti a. Heng tanpuina hmang te hian heng mi themthiamte hian hma an la thei dawn a ni a ti a. Bank ten an rawn phurpui chuan he scheme hnuaiah hian hlawhtlinna tam tak a hmuh theih dawn tih sawiin bank te chu mipuite pui zel turin a ngen a ni.

Byte of Governor

Nimin atanga buatsaih PM Vishwkarma Exhibition cum Trade Fair hian naktuk thleng a aw hawn a. Zaninah hian concert huaihawt a ni ang a, exhibition-ah hian carnival leh naupang infiamna dah tel a ni baw k a ni.

(CORR)

<><><>

CM

Chief Minister Pu Lalduhoma'n Mizoram chhunga Myanmar, Manipur leh Bangladesh atanga raltlan awm te chu theihtawpa chhawmdawl mek an ni a ti a, an tanpuina chuan politics lama inpumkhatna thui takin a hril a ni a ti.

Nizan khan International Chin Christian Youth Conference (ICCYC) Inkhawmpui vawi - 2 na Chandmary Recreation Centre, Lawngtlai hian hmanpui na ah sawiin Chief Minister thlah tu pi leh pu ten Mizoram leh a chheh vel luahin, Lal neiin tlang dang dangah khawsa thin mahse, inpumkhatna tha tak an neih thin thu a sawi a. British sawkarin Mizoram an awp hnuaiah Zohnahthlakte chu thisen inzawm, thlah khat, chhulkhat chhuak an nihna hi a ni tiin rorelna pakhat hnuaia awm turin Chin- Lushai Conference chu Fort William, Kolkata, ah kum 1892 khan neih a ni, a ti. He Conference - hian Chin- Lushai te thlahkhat an nih thu pawmin, hmun khata awm turin an ti a, amaherawh chu harsatna hrang hrang avangin tlang dang dangah an lo awm ta ani a ti baw k.

Chief Minister chuan Lushai, Chin leh Kuki tih hi hnamdangin hming an phuah mai mai a nih thu a sawi a, Chhul khat chhuak an nih avanga inpumkhatna lam hawi tur an nih laia U leh nau kara in hmuh thiamlohna awm thin chu paw i a tih thu sawiin inpumkhatna lam hawi a tul tawh tak zet a ti. Rei tak chhung tlang dang danga awm hrang lo nih tawh avang a mihrang leh hnam dang ang a in enna awm thin chu sim a hun tawh tih a sawi baw k.

Pu Lalduhoma chuan Mizorama raltlan chhawmdawl dan chuan politics lama inpumkhatna thui tak a hril a ni, a ti a. Khawvel ram hrang hranga Zohnahtlakte inpumkhat turin mitinin mawhphurhna an nei tih sawiin theihtawp chhuah turin kalkhawmte a sawm nghal bawk.

(Lalngjeta Ralte PTC Lawnglai)

<><><>

VC ASSOCIATION

All Mizoram Village Council Association chuan sorkarin Village Council term a pawh tawi avanga High Court-a kal an tum chungchangah lehkha hrang hrang tihfel mek anih thu Akashvani an hrilh.

AMVCA President Pu K. Lalngaizuala chuan High Court-a kal an rel hnuah lehkha tihfel ngai te tihfelin an bawhzui nghal char char a, case an file theih tep thu Akashvani Correspondent a hrilh a. VC dan zahawmna humhim zel a pawimawh tih sawiin Pu K. Lalngaizuala chuan democracy palzutna leh zahlohna chu pawh an tih thu a sawi a. Nakina VC lo awm zel tur te tana kawngsialtu pawimawh tak nih an in beisei thu a sawi a, an dikna chanvo humhim tumin an bei zel dawn tih a sawi bawk.

BYTE OF PU K. LALNGAIZUALA...48 secs

Village Council term kal lai tih tawi a nih thu hi Local Administration department chuan thuchhuah siamin tun thla ni 21 khan nakum February ni 19-ah a tawp dawn thu an lo puang tawh a. Sorkarin financial year thar lo awm tura inthlan hautak tak tak pali awm tur tih zangkhaina tur leh sum renchem a duh avangin Village Council term kallai chu thla 6 in a pawt tawi tih LAD Minister Pu C. Lalsawivunga chuan a lo sawi tawh bawk a ni.

Tunkar Thawhlehnia All Mizoram Village Council Association General Conference, Dawrpui Multipurpose Hall, Aizawla neih chuan VC term sorkarin a tih tawi chungchangah High Court-a zualko an rel a, hemi ni hian High Court-a kalna tur hi thawhkhawm nghalin hma na la zui nghal char char a ni.

(Corr)

<><><>

MNF

MNF Senior Vice President Dr.R.Lalthangliana chuan Democracy ramah sum harsatna chhuanlama mipui thlan ngei, VC-te term pawh tawisak chu thil zahthlak tawp khawk a ni, a ti.

Wawiina MNF Party Office Mizo Hnam Runah chung inkhawm ah thusawiin Dr R Lalthangliana chuan 15th Finance Commission hnuai post devolution PDRDG a kiam chhoh nasat tak em avangin sum harsatna a awm lo theilo a, hei hi a hma daih atanga hriat lawk vek a ni a ti a, kumtin state pawisa hmuh tur chu kum 5 hma lamah hriat lawk vek a ni tawh a, urban local body leh rural local body atana sum hmuh tur hriatlawk vek anih avangin, VC inthlan hma chhanah LAD Minister-in a sawi nen chuan a inpersan hle a ni," a ti.

VC term pawhtawi chungchangah Home Minister te, LAD Minister te, Health Minister leh Adviser to CM (Pol) thusawite hi a inang lo theuh a. Sum harsat vang tih te, thawhpui an harsa tih te, fur ruahtui tlak hma tihte an sawi dan a inanglo nuk a. Sorkar chuan a duh chuan thuneihna a nei teh reng a, amaherawhchu mipuiin duh taka an thlante hi MNF leh Congress kha chuan kan sawisa ve vak vak ngailo, a ti bawk.

(DIPR)

<><><>

PARLIAMENT COMMITTEE ON RAILWAYS

Nimin khan Parliamentary Committee on Railways meeting, Parliament Annexe building Committee Roomah neih a ni a. Thutkhawmah hian India ram puma Rel lei dawh, lei verh, railway lei motor kawngpui in a tantlang chungchangte an thlir ho a ni.

Mizoram Rajya Sabha MP Pu K. Vanlalvena chuan Sihmui Railway bridge siam lai nikum a a chim thu leh hemi avanga kum khat lai hna thawh chhunzawm lova chawlhsan a nih thu te leh kumina zawh tura ruahman chu thawh zawh hman a nih tak loh bakah tun anga an thawh muan chuan nakum 2025 ah pawh zawh a nih dawn loh thute sawi chhuakin chak zawka hna thawh a nih theih nana hmalak a tul thu a sawi a ni.

Tun dinhmunah India ram pumah Railway lei 163810 a awm mek a. Chung zinga Lei 11918 te chu kum 2014 leh 2024 kum sawm chungah dawh thar te niin a siam nan cheng vaibelchhe 8208 hman ral a ni a. Lei verh hmun 540 ah awmin a thui zawng belh khawm chu KM 199.96 a ni bawk a. Rail kawng leh motor kawng in tantlang na hmun 17998 ah awm mek in heng Railway leh Highway intan tlangna hmun zawng zawng ah hian lei dawh vek tura ruahmanna siam a ni bawk.

North East Frontier Railway tawpna hmun ni tur Sihmui Rail Station siam mek chu nakum 2025 ah zawh tura ruahman niin he hna kal lai mek a hmuna endik tur hian Pu Vena ngenna bawhzuiin Parliamentary Study Team te Mizoramahrawn kal tura ruahmanna siam a ni.

(DIPR)

<><><>

CONGRESS YOUTH

Congress thalai chuan Lengpui panna kawng Tlawng Lei dawh mek hnathawh muang lutuk avangin mipuiin harsatna namen lo an tawk tih sawiin vawiin khan he hna thawh hi a hmunah an tlawh a,

Aizawl to Lengpui road, Sihhmui kawng Tlawng Lui chung a Lei inngahna nawr thlenna tur kawngpui tan tlanga kaina track siam a ngaih dawn vangin Oct ni 30 atang khan thla khat chhung awn turin lirthei eng chi mah tlan phal lohvin kawng khar turin sorkar chuan thuchhuah a siam a, hemi avang hian khualzin, mipui mamawh phurtu bakah damlo leh kuthnathawktu Aizawl, Lengpui Airport leh Mamit lam kal tur te pawh harsa takin Buichali lamah kal tir vek an ni.

Congress Thalai President Pu Laltawnliana vawiina helai hmuna thawktute chuan, mipui harsa zawk leh dam lo te dan an nih laiin mi hausa zawk leh awm thei zawk, motor nei tha zawkte dan an ni ve lo an ti a. Mipui veivahna senso a let engemaw zatin an sen belh zel a ngaih bakah Damlo leh khualzin te phurrit a thuahhnh nasa hle a. Hetianga mipui harsatna a thlen chung a lei dawh kai hna zawh a la ni lo leh hnathawktu mumal pawh an awm lo hi Congress thalai chuan mipui zahlohna leh ZPM sorkar leh a changtu Minister inthlahdahna dik takah a ngai a ni, an ti a ni.

Nikum October thlaa zawhfel hman tura tih chu a hun pawh sei niin kumin March 2024-a zawhfel tura tih leh a ni leh a, tun thlenga zawh theiha peih a la ni lo fo chu Mizoram PWD leh Company he lei dawhtute karah thawhona tha engmah a awm loh vang a ni an ti baw a. Hei hian a viltu Mizoram sorkar chak lohzia a tarlang a ni an ti baw.

Tlawng lei (Lengpui kawng) dawh hna hi India rama Inclined Network Arch Bridge hmasa ber tur nia ngaih a ni a. MT 432 vela rit niin metre 100-a sei tura ruahman a ni a. A zau zawng 7.5m niin lei sanna lai berah 17m a sang a ni. Lei dawh bakah hian a panna kawngpui Aizawl lamah 180m a thui leh Lengpui lamah 265.300m a thui hi an kutah a awm baw.

(PR)

<><><>

CONGRESS VC

Mizoram Pradesh Congress Committee Sr Vice President Pu Lalnunmawia Chuaungo chuan ZPM sorkar chu Sum enkawl chungchangah an hlawhchham lailet der a ti.

Vawiina Congress Party Office Congress Bhavan-ah thusawiin Pu Lalnunmawia chuan ZPM sorkarin an ti ang tia an sawi an tih loh vang leh an ti lovang an tih an tih leh si chu Sum leh pai enkawl thiamloh vang a ni a ti a, Village Council term an pawh tawi chhan ni a an sawi sum harsatna vang an tih chu chhuanlam tling a ni lo a ti a, VC term hi sawrkarin pawhtawi theihna nei mahse a duh duha a pawhseia pawhtawi theih a ni lo, a chhan leh vang mumal tak a awm tur a ni a ti.

ZPM Minister pahnhin tun hnaiah VC ten an thawhpui tha duhlo an ti a, ram leh hnam hmasawna atan VC ten thawhpui duh loh an nei ngai lo. Congress leh MNF sarkarah pawh a awm ngai lo a. Hei hi thuneihna hman diklohna, hmansualna dik tak a ni, a ti.

ZPM in SASCI sum an tih lapse chhan pawh Department ah sum an pekchhuah loh vang a ni a ti a. Sum awmsa chu Minister te chenna in chei nan te, Board Chairman hlawh atan te, tul lem lova sum tamtak an senral vang a ni tih sawiin Pu Lalnunmawia chuan Central-in State tan sum an n pek Department ah an pechhuak thei lova, State Matching Share an pe thei lova, chuvangin cheng Vaibelchhe 233 lai an ti lapse a ni, a ti.

Hei bakah hian NEEPCO chungchangah Power Minister-in thil hriatchian loh leh man loh a nei a ti a, he thu hi sawiho an huam anih chuan a inpeih reng a, hei hi thil diklo a thlen an duh loh avang leh thil dik hailan an duh vang a ni, a ti.

Pu Lalnunmawia chuan Lengpui Airport pawh Air Force kuta hlan tumna a kal zel ni a hriat a ni a ti a, Airport hi tihchangtlun zel a, tih len zel a, tih hmasawn zel tur a ni a, chumi atana rokhawlhna siam thei tur leh Airport-in hma a sawnna dal theitu tur chu Indian Airforce kuta hlan a ni, a ti.

(DIPR)

<><><>

AIR ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

<><><>

POLICE CONFERENCE

Union Home Minister Amit Shah chuan vawiin khan All India Conference of Directors General and Inspector General of Police, Bhubaneswar-ah a hawng. Ni thum awn tur he conference ah hian ramchung himna chungchanga thil pawimawh tak takte Police hotute hian an sawiho dawn a. Heng zingah hian firfiak dona, Left Wing Extremism, Coastal Security, New Criminal Laws, Narcotics chungchangte an ngaituah ang.

Prime Minister Narendra Modia chuan naktukah Police Conference hi a hmanpui dawn baw a ni. National Security Advisor Ajit Doval leh Principal Secretary to Prime Minister PK Mishra te pawhin an hmanpui dawn a ni.

Kan Correspondent report i lo ngaitu ang u.

(Newsonair)

<><><>

UGC

University Grant Commission chuan Under Graduate zirlaite tan degree course zir chhung pawhtawi emaw pawhsei theih dan tur a siam sak thuai dawn. UGC chuan hemi atana rawtna Accelerated Degree Programme leh Extended Degree Programme atana zawm tur Standard Operating Procedure chu a pawm tawh a. UGC Chairman M Jagadish Kumar chuan Accelerated Degree Programme hian zirlaite chu degree course kum 3 emaw kum 4 emawa zawh tur chu a aia hmaa zawh theihna remchang a siamsak dawn a ni.

(Newsonair)

